

侯者標善目錄 門人通編輯 嶺南弟子劉程相書校

慈山老人夢遊集

新文豐出版公司 印行

卍

侍者福善日錄  
門人通炯編輯

憨山老人夢遊集  
(四)

新文豐出版公司印行

憨山老人夢遊集卷之四十二

侍者福善目錄

門人通炯編輯

嶺南弟子劉起相重較

楞嚴通議補遺

首楞嚴一經。統收一代時教。迷悟修證因果。徑斷生死根本。發業潤生。二種無明。名結生相續。頓破八識三分。故設三種妙觀。攝歸首楞嚴大定。是爲最上一乘圓頓法門。直顯一真法界。如來藏性。稱爲妙圓真心。據此大定。列爲三觀者。以如來藏有三種義。謂空如來藏。不空如來藏。空不空如來藏。由此藏性。迷爲阿賴耶識。變起見相二分。藏性在

識名自證分。由本性不染。名白淨識。爲證自證分。  
按論真如生滅二門。此證自證分。卽是真如。其自  
證分。卽迷中本覺見分。卽前七轉識相分。卽虛空  
四大。在外爲世界山河大地。及五塵境。在內爲根  
身。爲有執受五蘊之色受二蘊。見卽七識意根。及  
六意識。及前五識。與同時分別意識。今修楞嚴大  
定。端在直破八識。但此識體久迷。由相見二分。結  
爲五蘊根身。及外世界五塵。爲分別俱生麤細我  
法二執。以執五蘊根身。爲我執。貪外五塵。爲我所  
受用。及計有所作。爲法執。由此二執。纏綿生死。故

今願出生死。先破二執爲最初方便也。故阿難特請妙奢摩他三摩禪那爲成佛之要。佛特許以三摩提名大佛頂首楞嚴王。此乃歷別而請。佛據一心圓融大定而說也。是知此經始終不出三觀。究竟不離一心耳。其經文雖未明言指歸。其於破顯之文。皎然明白。第流通者。未之究耳。三觀者。經妙奢摩他。卽當空觀。三摩。卽假觀。禪那。卽中道觀也。皆云妙者。意顯圓融三觀。妙契一心。舉一卽三。言三卽一。離卽離非。迥出思議之表也。今議此經通以體相用標顯者。意在先悟後修。故首標觀體。欲

令先悟藏性三諦理體。依之建立觀相。所謂先悟  
毘盧法界也。次示觀相者。意謂無相真心。今全迷  
爲識。結成五蘊根身器界有相之法。要在卽相而  
修。故修道文中。單指五蘊六根。次卽三科七大。一  
一皆是悟入之門也。證果分中。以觀用標者。正顯  
所修三觀。有能斷能證之力用也。故愚所謂始終  
不出三觀者。此也。

問曰。三觀以體相用分之者。何也。 答曰。名雖三  
觀。爲約如來藏三諦之理。須以三觀證之。其實總  
是一心。故佛以首楞嚴大定許之。意謂三觀不離

一心也。按起信論云。有法能起摩訶衍信根。所言法者。謂衆生心。是心總攝一切世間出世間法。故不名心而名法。然有法必有義。以體相用三爲一心之義。所謂三大是也。以此真心。其體廣大。故言體大。以此本來無相。今現十法界。依正因果事相。皆是有相之法。故相亦大。以迷此心而成六凡。悟此心而成四聖。皆一心轉變之妙用也。故用亦大。謂令先悟此心之體。佛謂開示此體。以便造修。故首明觀體也。既悟此體。了知根身器界。一切妄相。皆依一心建立。今將所悟之體。一一照破妄相。本



是妙明真心。故修但依妄相而修。故云觀相。正當  
修道之要也。其五十五位。皆依觀心建立。要顯此  
三觀。有能斷惑證真之大用。故爲三觀之用也。以  
論勘經。明文昭著。妙契佛心。故予判列無疑。以見  
如來說法之本意。且與行人易入也。

問曰。三觀體中。攝經三卷半文。且空觀一科。卽該  
三卷經文。至若三科七大。本如來藏。似顯空理。其  
初以徵心辨見發揮。以至二種妄見種種徵辨者。  
主何意耶。答曰。此經統收五教。卽此一空觀體。  
備該五教空理。徹一代之談。文簡義幽。殊難領會。



故予通議備列破顯題綱。使知節要。至於破妄顯真。經文止有卷半。其義已收。四十年前所說教義。非淺淺也。以吾佛出世說法四十九年。談經三百餘會。單爲破衆生我法二執耳。二執若破。卽證涅槃。涅槃者。卽如來藏寂滅一心也。以衆生迷。此如來藏心不生不滅。與生滅和合成阿賴耶識。此識具有四分。謂一證自證分。卽一心真如。二自證分。卽迷中本覺。當論中覺不覺義。三見分。卽前七轉識四相分。卽外器界。經中地水火風虛空。乃外五大。爲世界內之根身。卽五蘊衆生。以衆生旣迷此。

真心。但認五蘊幻妄身。爲己身心。妄執爲我。名分別我執。外世界五塵。爲我所受用。名分別法執。此分別二執。皆六識所計。以七識乃六識之根。依內外門轉。其實二識通計也。又有俱生我法二執。此單屬七識。計八識見分爲自內名我執。修行妄有證得爲法執。此二微細。名俱生二執。若二種二執破盡。乃可證入一心之源。是名爲佛。阿難旣迷真心。正爲二障所纏。必須破盡。乃是眞菩提路。故此三觀。乃破麤細二執之具也。其經文徵心辨見。乃通破麤細二種我執。二種妄見。及後破和合。乃通

破麤細二種法執。以此楞嚴大定。乃圓斷五住煩惱。齊了二種生死。不比諸經有先後也。以統收五教。頓證一心。故不證先後耳。

問曰。諸教別說。先斷分別二執。次斷俱生二執。此言總斷者何耶。答曰。七識乃我法二執之根。依內外門轉。若依外門。與六識作根。則有分別二執。若依內門。則執八識見分爲我。此乃俱生我執。此執至七地中乃斷。八地以上。猶有俱生法執者。以七識俱染淨二分義。故七地斷者。乃染分末那。向執八識見分爲我者。今此染分一斷。則捨藏識名。

而此八識卽轉證眞如。名白淨識。尙有淨分末那。執此眞如。謂我所證得。是爲微細法執。卽後經云。菩提心生。生滅心滅。猶屬生滅。以執眞如。有所證得。能所未忘。觀智未泯。尙爲微細法執。此執若斷。方入妙覺。證一心源。此義全合起信。勘定甚明。故云頓斷頓證。

問曰。此經破執之文。尙所未明。從來傳者。但云微心辨見而已。至於二種見妄。亦不知爲何而說也。今通議雖明列破顯之科。正當破執之義。先後次第。猶所未明。請細言之。答曰。所言精麤二執義。

關真妄二途。總不出八識五蘊耳。一代時教所破者。唯此而已。以迷一心。成阿賴耶識。此識具有四分。其前三分。卽五蘊身心世界。其證自證分。卽所證真如。今麤細二執。唯破四分。唯識攝歸一心爲極耳。故勘定經文。按此而破。先破五蘊。屬分別我執。其破識蘊。而俱生我執。卽兼帶其中。其二種見妄。乃破分別法執。此凡夫二乘之所共執者。故破二妄之後。卽顯本覺真心。以此故知俱生我執。已帶破在前矣。至次章云。汝雖先悟本覺明心。汝猶未明如是覺元。非和合生。非不和合等。此正破俱

生法執卽此經後云。菩提心生。生滅心滅。猶屬生滅。故此執一破。則頓歸藏性矣。故下文發明。一皆如來藏者。意顯前破。所顯者。乃但空耳。下會三科七大之文。乃顯妙有實相真空義耳。此實破妄之關鍵也。細心深思。乃見其妙。

問曰。破執經文。科雖分截。但通途次第。尙未了然。請詳言之。答曰。分別二執。卽一切衆生所執。五蘊身心世界。此屬八識相見二分。是也。其俱生我執。乃八識自證分。向被七識內執爲我。我者。經中見精。卽自證體。乃迷中本覺佛性。故經中二妄旣

破卽顯此本覺真心。此屬緣因佛性。從斷所顯者。未是離障真如也。以淨分末那。猶執此覺爲我所證得。此正微細法執。所謂法執不忘。已見猶存。華嚴八地菩薩。迷於真如理中。必待三橋七勸。方能捨者。以異熟未空。顯最難斷也。卽從八地進入等覺。勘此經文二妄之後。佛言。汝雖先悟本覺明心。汝猶未明如是覺元。非和合生。及不和合。意在破和合覺。謂始覺合乎本覺。名究竟覺。猶屬和合對待。故此和合一破。卽顯如來藏性。頓證一心之源矣。是知八地以上。乃破俱生法執耳。論說佛有淨



分末那義在此也。其破分別二執之文。從初請定。直至破見精後。通破五蘊身心。而俱生我執。亦在所破。二妄之文。單破分別法執。其旨甚明。

問曰。初破五蘊。而如來乃首約徵心。而科云。乃破色受二蘊。意猶未明。請直示之。答曰。八識相見二分。相乃四大。見乃轉識。以最初見分。搏取四大少分。爲我根身。論中所指。乃受執處。遂成五蘊之衆生。故經云。一迷爲心。決定惑爲色身之內者。此也。以色受二蘊。正是執受所依之處。名雖徵心。意顯此根身本空。非可依處。欲修大定。先須內脫身。

心故先破色受二蘊。色身既破。則無所執受。則妄心無依。故後進破六識爲想蘊耳。

問曰。徵心之後。阿難重請奢摩他路。如來放光。復詰其心。科爲破六識想蘊者。何也。答曰。初徵心爲破色受二蘊。正破小乘身見。意顯欲修大定。必須內脫根身也。以凡夫但認妄想爲心。外道依此妄計。小乘但斷六識。上二界天人。但滅六識。故佛最初卽云。一切衆生。皆由執此生死妄想。誤爲真實。雖云修行。不成聖果。故修大定。必首破之。以此妄想。一向執此根身。爲所依處。舉此執心。在此身。